

Resolución pola que s'aprueba la convocatoria de subvenciones a medios de comunicación pa la normalización social del asturianu y, nel so ámbitu, del eonaviegu, en réxime de concurrencia competitiva

RESOLUCIÓN

ANTECEDENTES DE FECHU

Primeru.- L'Estatutu d'Autonomía del Principáu d'Asturies y la Llei del Principáu d'Asturies 1/1998, de 23 de marzu, d'Usu y Promoción del Bable/Asturianu, señalen como competencia de l'Alministración autonómica'l fomentu y la protección del asturianu en toles sos variantes que, como modalidaes llingüístiques, s'usen nel territoriu del Principáu d'Asturies, amás del gallego-asturianu o eonaviegu nel so ámbitu. Ente les midíes específiques de promoción figura la convocatoria de subvenciones o ayudas que dexen impulsar l'usu del asturianu y del gallego-asturianu o eonaviegu n'iniciatives particulares, empresariales o asociatives y, en xeneral, como vehículu d'espresión cultural.

Segundu.- La xestión de la política llingüística ta incardinada n'ámbitu de la Conseyería de Cultura, Política Llingüística y Turismu en virtú de lo dispuesto en Decretu 22/2023, de 31 de xunetu, del Presidente del Principáu d'Asturies, de reestructuración de les Conseyeríes qu'integren l'Alministración de la Comunidá Autónoma, modificáu col Decretu 10/2024, de 16 de febreru, del Presidente del Principáu d'Asturies. En concreto, d'alcuerdu col Decretu 63/2024, de 27 de setiembre, de primer modificación del Decretu 25/2024, de 15 de marzu, pol que s'establez la estructura orgánica básica de la Conseyería de Cultura, Política Llingüística y Deporte, correspuende al Serviciu de Planificación y Normalización Lingüística «la convocatoria y xestión de les llinies de subvenciones, ayudas y premios pa la dinamización y promoción de la llingua asturiana en tolos ámbitos».

Terceru.- Por Resolución de la Conseyería de Cultura, Política Llingüística y Turismu de 2 de febreru del 2023 (BOPA n.º 50, de 14 de marzu del 2023) aprobáronse les bases reguladores de subvenciones a medios de comunicación pa la normalización social del asturianu y, nel so ámbitu, del gallego-asturianu o eonaviegu, en réxime de concurrencia competitiva (n'adelantre, bases reguladores de 2 de febreru del 2023).

Cuartu.- Por Resolución de 22 de febreru del 2023, de la Conseyería de Cultura, Política Llingüística y Turismu (BOPA n.º 40, de 28 de febreru del 2023), apruébase'l Plan Estratéxicu de Subvenciones pa los exercicios 2023-2025, modificáu por Resoluciones de 27 de xunu del 2023 (BOPA de 10 de xunetu del 2023), 20 de xunetu del 2023 (BOPA de 1 d'agostu del 2023) y 18 d'avientu del 2023 (BOPA de 4 de xineru del 2024), que'l so Anexu I incluye la llinia de subvenciones pa medios de comunicación pa la normalización social del asturianu y, nel so ámbitu, del gallego-asturianu o eonaviegu.

FUNDAMENTOS DE DERECHU

Primeru.- La Llei 38/2003, de 17 de payares, Xeneral de Subvenciones (n'adelantre, LXS), establez n'artículu 22 que'l procedimientu ordinariu de concesión de subvenciones ha tramitase en réxime de concurrencia competitiva, quier dicise, cola aprobación de la convocatoria pública correspondiente, después de l'aprobación de les sos bases reguladores. Amás, el Decretu del Principáu d'Asturies 71/1992, de 29 d'ochobre, pol que se regula'l Réxime Xeneral de Concesión de subvenciones (n'adelantre, Decretu 71/1992), establez nos artículos 6.2 y 7 que l'otorgamientu de subvenciones

innominaes y xenériques n'ámbitu de la comunidá autónoma del Principáu d'Asturies ha realizase pente medies de convocatoria pública, depués de l'aprobación de les sos bases reguladores.

Segundu.- La competencia p'aprobar les bases y convocar la concesión de la subvención correspuende a la persona titular de la Conseyería de Cultura, Política Llingüística y Deporte, al amparu de lo dispuesto n'artículu 67 del Testu Refundíu del Réxime Económicu y Presupuestariu, aprobáu por Decretu Llexislativu del Principáu d'Asturies 2/1998, de 25 de xunu (TRREPPA), en correspondencia col Decretu 25/2024, de 15 de marzu, pol que s'establez la estructura orgánica básica de la Conseyería de Cultura, Política Llingüística y Deporte.

Terceru.- Según l'artículu 41.1 TRREPPA, correspuende al Presidente del Principáu y a los consejeros l'autorización y disposición de los gastos propios de los servicios al so cargu y de los qu'estableza la llei de presupuestos xenerales de cada exerciciu o, si nun hubiere, la del exerciciu anterior, hasta la cantidá fixada por éstos. Pela so parte, l'artículu 7.1 de la Llei del Principáu d'Asturies 8/2024, de 27 d'avientu, de Presupuestos Xenerales pal 2025, indica que «va corresponder al presidente del Principáu y a los consejeros l'autorización de gastos por importe non superior a 750.000 euros, y la disposición de los gastos dientro de los topes de les consignaciones incluyies na sección del presupuestu correspondiente».

Cuartu.- La LXS afita nel so artículu 23.2 el conteníu mínimu de les convocatories aprobaes pol órganu competente.

Quintu.- Esta convocatoria, desde dirixida a entidaes que desenvuelven actividaes económiques, atópase sujeta al Reglamentu (UE) n.º 2023/2831 de la Comisión, de 13 d'avientu del 2023, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudes *de minimis* (DOUE L 352, de 15/12/2023), norma esta d'algame xeneral, aplicable directamente y obligatoria en tolos sos elementos.

Sestu.- Existe creitu afayadizo y abondo na aplicación presupuestaria 21.02.455G.472012 de los Presupuestos Xenerales del Principáu d'Asturies pal 2025.

En resultes, vistos los preceptos llexales mentaos y demás d'aplicación xeneral, al traviés d'esti escritu

RESUELVO

Primero.- Autorizar un gastu destináu a esta convocatoria, por importe de SETENTA Y OCHO MIL TRESCIENTOS NOVENTA Y SEIS EUROS CON DIEZ CÉNTIMOS D'EURU (78.396,10 €), con cargu a l'aplicación presupuestaria 21.02.455G.472012 de los Presupuestos Xenerales del Principáu d'Asturies pal 2025.

Segundu.- Aprobar la convocatoria pública de subvenciones a medios de comunicación pa la normalización social del asturianu y, nel so casu, del eonaviegu, en réxime de concurrencia competitiva, que va desenvolvese d'aluerdu coles prescripciones que s'indiquen de siguío:

1.- Oxetu

1.1. Esta convocatoria tien como oxetu la concesión de subvenciones, en réxime de concurrencia competitiva, a empreses titulares de prensa, radio, televisión o medios de comunicación en llinia, pa financiar les inversiones feches na producción d'espacios onde s'use l'asturianu, o'l gallego-asturianu o eonaviegu nel so ámbitu, bien davezu n'informaciones xenerales, bien n'espacios periódicos y fixos, bien en programes d'interés especial, pero siempre qu'ayuden a la normalización y dignificación social d'estes llingües n'espacios configuraos como propios de la empresa o mediu de comunicación y asumíos por él.

1.2. Los proyectos subvencionables van ser los realizaos, amás d'a lo llargo del exerciciu d'esta convocatoria, hasta la fecha máxima de xustificación establecida nella, nos meses de payares y avientu del exerciciu 2024, siempre que nun se subvencionaren na convocatoria anterior.

1.3. Ensin perxuiciu de la posible presentación de dellos proyectos por cada empresa solicitante, namás van poder ser oxetu de subvención un máximu de trés de los proyectos presentaos. Nesi casu, van entendese desestimaos automáticamente los proyectos presentaos por una mesma solicitante que sacaren peor puntuación en comparanza colos sos proyectos meyor puntuao.

2.- Réxime xurídicu

Ensin perxuiciu de lo dispuesto na LXS y nel Reglamento (UE) n.º 2023/2831 de la Comisión, de 13 d'avientu del 2023, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudes *de minimis* (DOUE de 15/12/2023), esta convocatoria de subvenciones va rexise poles bases reguladores de 2 de febreru del 2023.

3.- Gastos subvencionables

Los gastos subvencionables van ser los establecíos n'apartáu VIII de les bases reguladores de 2 de febreru del 2023.

Los gastos indirectos del proyectu van ser subvencionables hasta un máximu del 40 % del presupuestu aprobáu, siempre qu'a criteriu de la Comisión de Valoración seyan necesarios y xustificaos pal so desenvolvimientu y s'estableza a les clares el porcentaxe d'imputación de los mesmos nel presupuestu presentáu.

4.- Requisitos pa solicitar la subvención y manera d'acreditalos

4.1. Va poder solicitar estes subvenciones cualquier empresa privada (persona física o xurídica) que seya titular d'un mediu de comunicación d'ámbitu asturianu y que tenga'l domiciliu social, establecimientu o delegación comercial nel Principáu d'Asturies. La empresa tien que cumplir los requisitos establecíos n'apartáu II de les bases reguladores de 2 de febreru del 2023.

4.2. La solicitud ha presentase nel modelu normalizáu que s'atopa disponible na sede electrónica del Principáu d'Asturies (www.asturias.es), portal onde ta publicada la ficha de serviciu, que se va poder localizar introduciendo'l códigu [AYUD0064T01](#) nel buscador de cabecera (asitiáu na parte cimera derecha de la páxina) y na que se va atopar amás el testu íntegru de la Resolución de Convocatoria, les bases reguladores y información complementaria.

Ha presentase una solicitú por cada proyectu.

4.2.1. La solicitú tien que s'acompañar necesariamente de los documentos que s'indiquen de siguío:

— Nel casu de persona física:

- Copia del DNI (*).

— Nel casu d'entidá xurídica:

- Copia del NIF (*).
- Copia d'escritura de constitución y les sos modificaciones. Si se solicita más d'un proyectu, esti documentu namás ye menester presentalu nuna ocasión. De toles maneres,

si la escritura yá la presentó enantes la entidá solicitante énte l'Alministración, nun va tar obligada a apurrir esta documentación, siempre qu'indique en qué momentu y énte qué órganu alministrativu lo presentó, y el númberu d'espeditu.

- Acreitación de la condición de representante a la fecha de presentación de la solicitú.
- Copia del DNI de la persona qu'actúe como representante de la entidá.

— **Tanto les persones físiques como xurídiques han presentar en cada proyectu:**

- a) Documentu actualizáu acreitativu de tar dada d'alta nel epígrafe correspondiente del IAE (*) y na Seguridá Social como empresa.

El conteníu de la documentación presentao d'aluerdu con esti apartáu tien qu'acreitar que la entidá cumple coles condiciones pa ser beneficiaria d'estes ayudes, según lo previstu nel puntu 4.1.

- b) Documentación acreitativo de que la entidá solicitante tien el domiciliu social, establecimientu o delegación comercial nel Principáu d'Asturies (*).
- c) Ficha d'acreeedores rellenada correctamente y tramitada pola entidá bancaria (namás cuando se solicite subvención del Principáu d'Asturies la primer vez, o cuando hubiere dalgún cambéu que se tenga que señalar nella).
- d) Proyeutu detalláu, qu'ha tener esti conteníu mínimu y imprescindible:
- Calendariu de realización y execución del proyectu. El proyectu ha tener como fecha máxima d'execución el 31 d'ochobre del 2025.
 - Documentación que dexe valorar l'algame y difusión del mediu, qu'ha ser: tratándose de prensa escrita, certificación emitida pola imprenta correspondiente onde s'indique'l númberu d'exemplares impresos nel añu 2024 (de xineru a avientu inclusive), o bien certificación d'empresa auditora acreitada onde conste'l númberu d'exemplares impresos nel 2024; pa radio y televisión, datos del últimu Estudiu Xeneral de Medios o certificación d'empresa auditora acreitada tocante a les audiencies nel 2024; pa medios de comunicación en llinia, númberu d'usuarios únicos del mediu, apurríu pola ferramienta Google Analytics, nel 2024.
 - Identificación de tolos redactores n'asturianu, amás de los traductores a esta llingua, con una reseña curtia sobre la so formación y esperiencia profesional rellacionada cola llingua asturiana. Ha indicase espresamente cuállos d'ellos son personal propiu de la empresa y quién son personal esterior.
 - Al respective de los collaboradores n'asturianu del mediu, ha facese constar quién son y de qué conteníos se va ocupar caún d'ellos.
 - Indicación espresa del porcentaxe de conteníos n'asturianu dientro del total de conteníos del mediu.
 - Los proyectos de los medios de prensa escrita han acompañase de testos de muestra que dexen valorar amañosamente la calidá llingüística y han indicarán númberu de páxines, sitiu d'inxerimientu, periodicidá, díes de publicación, temática, estructura, personal de redacción, collaboraciones y tola información que seya menester pa la concreción máxima del proyectu cola mira valoralu.
 - Los proyectos de les emisores de radio y televisión van poder acompañase d'una maqueta de muestra, y en tou casu han indicar planificación temporal, guión del

programa o programes, duración de los espacios, díes y hores d'emisión, oxetivos del programa, temática, estructura de la programación, personal de redacción y collaboración, y tola información que seya menester pa la concreción máxima del proyectu cola mira de valoralu.

- Los proyectos d'Internet han acompañase d'una muestra escrita onde se concrete'l mapa web, la estructura de la páxina, muestra de textos que dexe valorar amañosamente la calidá llingüística, y tola información que seya menester pa la concreción máxima del proyectu cola mira de valoralu. Nel casu de los podcast, ha axuntarse polo menos una maqueta de muestra.
- e) Presupuestu equilibráu, qu'incluya les partíes que lu integren, recoyendo los gastos y ingresos de l'actividá pa la que se solicita ayuda, onde se recueya l'aportación económica de la persona o entidá solicitante pal desenvolvimientu de l'actividá (esta ha ser, polo menos, d'un 10 % del presupuestu total de l'actividá). Nel presupuestu ha facese constar l'importe de l'ayuda económica solicitada.
- Han indicase espresamente los porcentaxes d'imputación al proyectu de caún de los conceptos qu'integren el presupuestu; quier dicise, qué porcentaxe de cada gasto correspuende a la elaboración de conteníos n'asturianu y/o en eonaviegu. Amás, han especificase los criterios oxetivos que s'usaron pa determinar esi porcentaxe d'imputación, nun siendo posible subvencionar aquellos gastos onde nun se pueda determinar cómo se calcularon los porcentaxes y les cantidaes resultantes.
- f) Certificación acreitativa de que la entidá atópase al corriente de les sos obligaciones tributaries, de nun ser deudora cola Hacienda del Estáu nin cola Hacienda del Principáu d'Asturies y del pagu de cotizaciones a la Seguridá Social (*).
- g) Declaración responsable de la persona que represente a la entidá, relativa a nun tar incurso ésta nes prohibiciones pa obtener la condición de beneficiaria, previstes n'artículo 13 de la LXS, y de que xustificó les subvenciones y ayudas concedíes enantes pola Comunidá Autónoma (incorporada al formulariu de solicitú).
- h) Declaración responsable relativa a otres subvenciones, ayudas, ingresos o recursos solicitaos y, nel so casu, concedíos pa la mesma finalidá, por cualquier Alministración Pública o entes públicos o privaos, nacionales o internacionales, con indicación de la entidá concedente, fecha y importe; nel casu contrariu, declaración de que nun solicitó nengún tipu d'ayuda pa la realización d'esta actividá (incorporada al formulariu de solicitú).
- i) Declaración referente a toles demás ayudas *de minimis* recibíes nos dos exercicios fiscales anteriores y nel exerciciu fiscal en cursu que tean suxetes al Reglamentu (UE) n.º 2023/2831 de la Comisión, de 13 d'avientu del 2023, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudas *de minimis* (DOUE de 15/12/2023), o a otros reglamentos *de minimis*.
- En nengún casu se van subvencionar proyectos d'entidaes solicitantes onde l'importe total de les ayudas *de minimis* concedíes pase de 300.000 euros en cualquier periodu de trés exercicios fiscales.

4.2.2. La presentación de la solicitú pola entidá solicitante va suponer, sacante manifestación espresa en contrario, l'autorización al órganu xestor pa recoyer la información correspondiente cola mira de verificar los requisitos anteriores marcaos con asteriscu (*). Si'l solicitante manifestare oposición espresa a la consulta o obtención al traviés de la ferramienta d'interoperabilidá ente les Alministraciones públiques de la documentación señalao enriba, va tener que lo presentar.

Si l'interesáu nun diere'l consentimientu nin tampoco presentare los documentos marcaos con asteriscu (*) acreitativos del cumplimientu de los requisitos mentaos, va ser causa pa requeri-y los mesmos,

d'alcuerdu colo previsto n'artículu 68 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques (n'adelantre, Llei 39/2015, de 1 d'ochobre).

5.- Comisión de valoración y órganu competente pa la instrucción y resolución del procedimientu

5.1. L'instructor del procedimientu va ser la persona titular del serviciu qu'ente les sos competencies tea la convocatoria y xestión de les llinies de subvenciones y ayudes pa la dinamización y promoción de la llingua asturiana n'ámbitu de los medios de comunicación.

5.2. Va ser competente pa resolver el procedimientu de concesión de les subvenciones la persona titular de la consejería con competencies en materia de política llingüística, depués d'informe de la comisión de valoración.

5.3. La comisión de valoración ha presidila la persona titular de la direcció xeneral competente en materia de política llingüística (o persona en quien delegue), y ha integrala un mínimu de trés y un máximu de cinco persones que van actuar en calidá de vocales, de les que lo menos dos han de ser personal adscritu al órganu instructor y les demás van poder ser persones rellacionaes col ámbitu de la llingua, la cultura y/o la comunicación asturianas. Ha de actuar como secretariu/a un emplegáu públicu o una emplegada pública con adscripción a la direcció xeneral competente en materia de política llingüística.

Nel casu d'ausencia o enfermedá y, en xeneral, cuando se dea dalguna causa xustificada, los miembros titulares de la comisión de valoración han de sustituyise por quien l'órganu competente designe como suplentes.

El/La presidente/a de la comisión de valoración va poder convocar, en calidá d'asesores, a otres persones a tenor de les característiques de la materia que se va analizar, que van actuar con voz, pero ensin votu.

Tanto la persona instructora del procedimientu como la comisión de valoración van poder pidir aclaraciones sobre aspectos de la documentación que presenten duldes que quiten d'aprecialos y evalualos correctamente. Nel casu de non contestación al pidimientu d'aclaraciones, o d'aclaración insuficiente, nun se van tener en cuenta esos aspectos del proyectu.

El funcionamientu de la comisión de valoración va rexise polo previsto pa los órganos colexaos nos artículos 15 y siguientes de la Llei 40/1015, de 1 d'ochobre, de Réxime Xurídicu del Sector Públicu, en tolo non previsto espresamente nes bases o nesta convocatoria.

La comisión de valoración designada en cada convocatoria tamién va tener competencies en materia d'interpretación de les bases nel so ámbitu d'actuación, ensin perjuiciu de les competencies propies del órganu concedente.

5.4. El plazu máximu pa resolver y notificar la resolución del procedimientu va ser de seis meses. El plazu va computase de magar s'espublice la convocatoria correspondiente nel *Boletín Oficial del Principáu d'Asturies*.

Desque trescurra'l plazu máximu ensin recayer resolución espresa, les entidaes solicitantes van poder entender desestimaes les solicitúes por silenciu alministrativu.

6.- Plazu y sitiu pa la presentación de solicitúes

Les solicitúes han de presentase nel plazu de 20 díes hábiles a cuntar dende l'otru día d'espublizase l'extractu d'esta convocatoria nel BOPA, según modelu normalizáu que s'atopa disponible na ficha de serviciu publicada na sede electrónica del Principáu d'Asturies (<https://sede.asturias.es>). Pa localizala

va poder metese'l códigu AYUD0064T01 nel buscador de la cabecera (asitiáu na parte cimera derecha de la páxina).

Les solicitúes han presentase d'alcuerdu col artículu 16 de la Llei 39/2015, de 1 d'ochobre, ensin perxiciu de lo dispuesto n'artículu 14.2 del mesmu testu llegal al respective de la obligación de rellacionase de manera electrónica pa los suxetos indicaos nél.

Si dalguna de les entidaes solicitantes obligaes a presentar la solicitú de manera electrónica la presenta presencialmente, va requerise que lo igüe presentándola electrónicamente. Pa estos efectos va considerase como fecha de presentación aquella na que se fixere la iguadura, d'alcuerdu colo señalao n'artículu 68.4 de la Llei 39/2015, de 1 d'ochobre.

Si la solicitú nun cumple tolos requisitos esixíos na norma de convocatoria, l'órganu competente va requerir a la persona o entidá interesada que la igüe nel plazu máximu y improrrogable de 10 díes, indicándoy que, si nun lo fixere, va considerase que desistió del so pidimientu, depués de resolución que se va tener que dictar nos términos previstos del artículu 68 de la Llei 39/2015, de 1 d'ochobre.

7.- Procedimientu de concesión

7.1. El procedimientu de concesión de subvenciones va tramitase en réxime de concurrencia competitiva, na forma establecida n'artículu 24 de la LXS, coles precisiones conteníes n'apartáu X de les bases reguladores de 2 de febreru del 2023.

La resolución del procedimientu va espublizase en *Boletín Oficial del Principáu d'Asturies*. Esa publicación va producir los efectos propios de la notificación, y esto d'alcuerdu colo estableció n'artículu 45.1 y concordantes de la Llei 39/2015, de 1 d'ochobre.

Esta resolución pon fin la vía alministrativa y contra ella pue interponese recursu contencioso-alministrativu o, si ye'l casu, recursu potestativu de reposición qu'habrá interponese énte l'órganu que dictó la resolución.

7.2. Namás van poder recibir subvención aquellos proyectos qu'algamen o pasen la puntuación mínima de 51 puntos, por una cantidá máxima de 30.000 € por proyectu, y siendo'l 90 % el porcentaxe máximu subvencionable del presupuestu aprobáu axustáu.

7.3. Los proyectos van ordenase pola puntuación sacada, n'orde decreciente, de mayor puntuación a menor puntuación, estableciéndose una prelación ente los mesmos cola mira de determinar el porcentaxe subvencionable del presupuestu aprobáu axustáu, que va aplicase a tenor d'estos tramos de puntuación:

- Si'l proyectu saca ente 100 y 91 puntos, la cantidá de la subvención va ser el 90 % del presupuestu aprobáu axustáu.
- Si'l proyectu saca ente 90 y 81 puntos, la cantidá de la subvención va ser el 85 % del presupuestu aprobáu axustáu.
- Si'l proyectu saca ente 80 y 71 puntos, la cantidá de la subvención va ser el 80 % del presupuestu aprobáu axustáu.
- Si'l proyectu saca ente 70 y 61 puntos, la cantidá de la subvención va ser el 70 % del presupuestu aprobáu axustáu.
- Si'l proyectu saca ente 60 y 56 puntos, la cantidá de la subvención va ser el 60 % del presupuestu aprobáu axustáu.
- Si'l proyectu saca ente 55 y 51 puntos, la cantidá de la subvención va ser el 50 % del presupuestu aprobáu axustáu.

7.4. Cuando'l creitu autorizao nun seya abondo pa financiar les cantidaes asignaes d'alcuerdu colos criterios de valoración señalaos enantes, va menguase la cantidá de les subvenciones que se concedan, repartiendo'l déficit de financiamientu proporcionalmente a la cantidá asignada de primeres.

8.- Criterios de valoración

D'alcuerdu col apartáu IX de les bases reguladores de 2 de febreru del 2023, la comisión ha valorar los proyectos según los criterios afitaos nelles y siguiendo esti detalle:

a) Calidá y interés normalizador del proyectu presentáu.

Va puntuase hasta un máximu de 30 puntos, d'alcuerdu con esta baremación:

- b.1) Alta calidá, orixinalidá y innovación, capacidá de representación de la realidá y contribución al desenvolvimientu de la normalización llingüística: 20 a 30 puntos.
- b.2) Media calidá, orixinalidá y innovación, capacidá de representación de la realidá y contribución al desenvolvimientu de la normalización llingüística: 10 a 20 puntos.
- b.3) Escasa calidá, orixinalidá y innovación, capacidá de representación de la realidá y contribución al desenvolvimientu de la normalización llingüística: 1 a 9 puntos.
- b.4) Nula calidá, orixinalidá y innovación, capacidá de representación de la realidá y contribución al desenvolvimientu de la normalización llingüística: 0 puntos.

Nun va ser subvencionables aquellos proyectos que se califiquen con 0 puntos nesti apartáu.

b) Grau de corrección llingüística del proyectu presentáu.

Va valorase hasta un máximu de 25 puntos, d'alcuerdu con esta ponderación:

- a.1) Escelente corrección ortográfica, sintáctica y riqueza léxica: 18 a 25 puntos.
- a.2) Bona corrección ortográfica, sintáctica y riqueza léxica: 9 a 17 puntos.
- a.3) Suficiente corrección ortográfica, sintáctica y riqueza léxica: 1 a 8 puntos.
- a.4) Insuficiente corrección ortográfica, sintáctica y riqueza léxica: 0 puntos. Van recibir tamién 0 puntos aquellos proyectos nos que se note a les clares l'usu de traductores automáticos ensin revisión posterior.

Nun va ser subvencionables aquellos proyectos que se califiquen con 0 puntos nesti apartáu.

c) Algame y difusión.

Va puntuase hasta un máximu de 15 puntos, que se van asignar d'esta manera:

Va obtener 15 puntos aquel mediu qu'acréite, en cada soporte (prensa escrita, radio, televisión, medios de comunicación en llinia), que tien la mayor difusión d'ente los presentaos nesi mesmu soporte na convocatoria.

Va recibir 0 puntos el proyectu presentáu por un mediu de comunicación que nun acreíte l'algame y difusión d'alcuerdu colo estableció nesti apartáu.

Los demás proyectos presentaos van valorase proporcionalmente, según esta fórmula:

Puntuación del proyectu que se valora = datos de difusión d'esi proyectu x 15/datos de difusión del proyectu que sacó la mayor puntuación nesi soporte.

Pa valorar la difusión van tenese en cuenta los criterios señalados n'apartáu 4.2.1. d) d'esta convocatoria.

d) Tresversalidad na temática del proyectu presentáu.

Hasta 15 puntos, según esta distribución:

- d.1) Van sacar 15 puntos aquellos medios que seyan de calter xeneralista.
- d.2) Van sacar 10 puntos los medios que dispongan de delles secciones temátiques, ensin ser xeneralistes.
- d.3) Van recibir 5 puntos los medios que traten sobre un tema o materia namás.

e) Porcentaxe de conteníos n'asturianu y/o n'eonaviegu dientro de los conteníos totales d'esi mediu.

Hasta 10 puntos.

Van asignase 10 puntos a aquellos medios que los sos conteníos tean dafechu n'asturianu o n'eonaviegu.

Los demás medios van tener una puntuación proporcional al porcentaxe de conteníos n'asturianu o n'eonaviegu dientro del total.

Va recibir 0 puntos aquel mediu que nun indique espresamente'l porcentaxe de conteníos n'asturianu o n'eonaviegu qu'incluye dientro del total.

f) Personal propio.

Van recibir 5 puntos aquellos proyectos que pa la so execución dispongan de personal propio encargao d'elaborar conteníos n'asturianu y/o n'eonaviegu.

9.- Pagu de la subvención

9.1. Con calter xeneral, el pagu de les subvenciones va facese efectivu desque se xustifique na manera establecida n'apartáu XIII de les bases reguladores de 2 de febreru del 2023, pente medies de tresferencia bancaria a la cuenta asignada pola persona beneficiaria.

9.2. A pesar de lo dispuesto n'apartáu anterior y con calter escepcional, nesta convocatoria, y según lo dispuesto n'apartáu XV de les bases reguladores de 2 de febreru del 2023, los proyectos subvencionaos con un importe inferior a seis mil diez euros (6.010 €) van pagase desque pasen 15 díes hábiles dende la publicación de la resolución de la concesión en *BOPA*, siempre que nun haya primero arrenunciu espresu del solicitante.

Les subvenciones d'importe superior a seis mil diez euros (6.010 €) van pagase depués de petición y presentación de garantía, d'alcuerdu colo dispuesto n'artículu 12 del Decretu del Principáu d'Asturies 71/1992, de 29 d'ochobre, nos términos de la Resolución de fecha 11 de febreru del 2000, pola que se regula'l Réxime de Garantíes pal Pagu Antemanáu de Subvenciones, y les sos modificaciones posteriores.

En tolos casos, pa pagar la subvención concedida precísase presentar el certificáu del órganu correspondiente qu'acréite tar al corriente de les obligaciones tributaries y cola Seguridá Social, y nun tener deudes cola Hacienda del Principáu d'Asturies, quitando d'esta obligación cuando la cantidá de la subvención, por beneficiariu y añu, nun pase de 3.005,06 €, tal y como s'establez n'artículu 10.3 d) del

Decretu del Principáu d'Asturies 71/1992, de 29 d'ochobre, en correspondencia col apartáu XIII.4.c) de les bases.

De toles maneres, el pagu antemanáu de la subvención nun quita de la obligación d'acreditar en plazu'l cumplimientu de les condiciones establecíes na resolución de concesión.

10.- Xustificación de la subvención

La xustificación ha facese na forma establecida n'apartáu XIII de les bases reguladores de 2 de febreru del 2023, pol sistema de cuenta xustificativa; en concreto, la llista clasificada de gastos y inversiones de l'actividá ha presentase según modelu que s'atopa disponible na ficha de serviciu publicada na sede electrónica del Principáu d'Asturies (<https://sede.asturias.es>). Pa localizala va poder metese'l códigu 2002114 nel buscador de la cabecera (asitiáu na parte cimera derecha de la páxina).

Como muestra de l'actividá subvencionada va haber que presentar copia de tolos exemplares impresos; nel casu d'actividaes de calter audiovisual, muestra de les grabaciones y certificaciones d'emisión, y nel casu de páxines web, muestra nun formatu que dexa visualizar el conteníu de la páxina en xeneral y los testos inxertaos.

El plazu máximu pa xustificar les ayudes concedíes va ser el 10 de payares del 2025.

11.- Revocación, reintegru y réxime de sanciones.

La revocación, reintegru y de réximen de sanciones va llevase alantre d'alcuerdu colo establecíu n'apartáu XVIII de les bases reguladores de 2 de febreru del 2023.

Atendiendo a lo dispuesto n'apartáu XVIII.1.b), l'incumplimientu del proyectu superior al 50 % va equivalir a la revocación dafechu de la subvención concedida.

Tercero.- Disponer la publicación del extractu d'esta convocatoria en *Boletín Oficial del Principáu d'Asturies (BOPA)*, pudiendo consultase'l testu completu de la mesma na Base de Datos Nacional de Subvenciones (<http://www.pap.minhap.gob.es/bdnstrans/index>), d'alcuerdu colo previstu nos artículos 18.2 y 20.8.a) de la LXS.

Este actu pon fin a la vía alministrativa y contra él pue interponese:

- a) Recursu potestativu de reposición énte la persona titular de la Conseyería de Cultura, Política Llingüística y Deporte. El plazu pa la presentación d'esti recursu va ser d'un mes.
- b) Recursu contencioso-alministrativu énte la Sala de lo Contencioso-Alministrativu del Tribunal Superior de Xusticia del Principáu d'Asturies. El plazu pa la presentación d'esti recursu va ser de dos meses.

Estos dos recursos nun pueden simultaniase y el plazu pa la so interposición va cuntase, en dambos casos, dende l'otru día d'espublizase esta resolución en *Boletín Oficial del Principáu d'Asturies* (d'alcuerdu a lo establecíu n'artículu 28 de la Llei del Principáu d'Asturies 2/1995, de 13 de marzu, sobre Réxime Xurídicu de l'Alministración del Principáu d'Asturies; y n'artículu 123 de la Llei 39/2015, de 1 d'ochobre). Too esto ensin perjuiciu de que los interesaos puedan exercitar cualquier otu recursu que-yos paeza oportunu.

Ana Vanessa Gutiérrez González
Conseyera de Cultura, Política Llingüística y Deporte